



**LEMANU P. S. MAUGA**  
GOVERNOR

**OFFICE OF THE GOVERNOR**  
**AMERICAN SAMOA GOVERNMENT**  
Telephone: (684) 633-4116 Fax: (684) 633-2289

**TALAEUGA E. V. ALE**  
LIEUTENANT GOVERNOR

**Aso Sa o Tamaiti**  
**Faamanuiaga a le Kovana**  
*O lo Tatou Tofi*

E tulaga ese lenei Lotu Tamaiti ia i maua ma le Afioga i le Kovana Lutena Talauega i le faaeaina ua ta'u ai i maua o "tamā" o alo uma o le Teritori. Ua faamautu atili mai ai le tāua o tamaiti uma, ma le faapelepeleina o le oloa ua foa'iina mai ma a latou meaalofa ma malosiaga ua tofusia ai.

E lagona i le loto upu a le toa i le Salamo 127, *O fanau o le tofi lea, ma le tau'i lea mai ia te ia.* O o tatou atalii ma afafine, *E pei o ū fanafana i lima o le toa.* Amuia le tagata ua tumu ai lana utu i ū fanafana ua tapena. Fai mai Tavita, *E lē mamā i latou i e ita mai.*

Ou te mitamita e faapea atu, o outou o alo faapelepeleina o Amerika Samoa, o ū fanafana i la tatou utu. O le aso nei ma aso uma tatou te faailogaina ai ma le fiafia ma le faafetai i le Atua na ia foa'iina mai lo outou soifua, o oloa taua mo lo tatou atunuu. Avea ia outou ma pale matagofie e fiafia ma mitamita ai o outou matua ma aiga.

Tatou te manatua ma le alofa auauna a le Atua na latou aumaia le faata'ita'iga e faatauaina alo laiti ma talavou i lo tatou atunuu. E faapena foi se agaga faafetai i auauna faifeau ma a'oa'o ma faletua i aulotu taitasi, faia'oga o Aoga Aso Sa ma Autalavou sa tuuina atu le malosi ma aso e tele e tapena ai le fanau mo lenei aso.

O le upu moni e pei o le fuaitau amata o le Salamo sa ta'ua, *Afai e le atiina'e e le Alii le fale, e galulue fua i latou o e atiina'e.* O loo outou tuuina ifo le faavae mautu o le mata'u i le Atua i lo tatou tofi. O le tatalo ia avea i matou o ta'ita'i ma tamā e faia mea sili mo le atiina'e faatasi o o tatou alo ma fanau.

E momoli atu le faafetai i matua uma, aiga, ma afioaga i le galulue punoua'i e atiina'e ia aoga ma lelei le lumana'i o Amerika Samoa. Faamalo faitama. E avatu ai foi faamafanafanaga i aiga faavauvau ona o fanau pele ua aveesea ua le mafai ona tatou fiafia faatasi i lenei aso.

Ia manuia ma saogalemu le Lotu a Tamaiti!

**LEMANU P. S. MAUGA**  
Kovana